



2024 წლის I კვარტალის ეკონომიკური ზრდის ტემპის პროგნოზი


საქართველოს პარლამენტის
საბიუჯეტო ოფისი

2024
თებერვალი

პარლამენტის საბიუჯეტო ოფისის შეფასებით, 2024 წლის I კვარტალში რეალური მშპ-ის ზრდის ტემპი დადებითი იქნება და 7.2% დაფიქსირდება.

პარლამენტის საბიუჯეტო ოფისის შეფასებით, 2024 წლის I კვარტალში რეალური მშპ-ის ზრდის ტემპი დადებითი იქნება და 7.2% დაფიქსირდება. მშპ-ის მოსალოდნელი ზრდა 2024 წლის პირველ კვარტალში განპირობებულია წინა წელს დაწყებული გაუმჯობესებული ეკონომიკური მდგომარეობის შენარჩუნებით. მიუხედავად იმისა, რომ 2023 წლის პირველ კვარტალში ეკონომიკის ზრდის საბაზისო ეფექტი მაღალი იყო (2023 წლის პირველ კვარტალში ეკონომიკა გაიზარდა 8.2%-ით), ეკონომიკური მდგომარეობის გაუმჯობესება კვლავ გრძელდება. უნდა აღინიშნოს, რომ ეკონომიკის ზრდის მაღალი ტემპი შენარჩუნდა 2023 წლის IV კვარტალში. კერძოდ, სტატისტიკის ეროვნული სამსახურის წინასწარი მონაცემებით 2023 წლის IV კვარტალში საშუალო რეალური ზრდა 6.8%¹-ით განისაზღვრა, რაც აღემატება პარლამენტის საბიუჯეტო ოფისის მეოთხე კვარტლის პროგნოზს (6.2%)². საბიუჯეტო ოფისის 2024 წლის პირველი კვარტლის ეკონომიკური ზრდის პროგნოზი ემყარება დაშვებებს, რომ 2023 წლის პირველ კვარტალთან შედარებით:

- ტურიზმის მოცულობა დაახლოებით 1.2-ჯერ გაიზრდება (2019 წლის პირველი კვარტლის პანდემიამდელ მაჩვენებელთან შედარებით დაახლოებით 1.04-ჯერ ნაკლები). ამავე დროს გაიზრდება ქვეყნიდან გასული ვიზიტორების რიცხოვნობაც.
- ტურიზმის ექსპორტის მნიშვნელოვან ზრდასთან ერთად კვლავ შენარჩუნდება შიდა ტურიზმის აქტივობა.
- გაიზრდება როგორც კერძო, ასევე მთავრობის მოხმარების მოცულობა. აღსანიშნავია, რომ საბიუჯეტო ოფისის მოსაზრებით, კერძო მოხმარების ზრდის ტემპი ჩამორჩება მთავრობის მოხმარების ანალოგიურ მაჩვენებელს.
- ინვესტიციების მოცულობა მნიშვნელოვან კონტრიბუციას შეიტანს ეკონომიკურ ზრდაში, მათ შორის გაიზრდება კერძო და მცირედით შემცირდება მთავრობის ინვესტიციების მოცულობა.
- ჯამურად გაიზრდება მთლიანი მოხმარება და ინვესტიციები, რაც განაპირობებს ეკონომიკური აქტივობის აღნიშნულ დადებით ტემპს.



*პროგნოზის ინტერვალი აღნიშნავს დიაპაზონს, რომელშიც მშპ-ის ზრდის ტემპი იქნება მოცემული. ინტერვალის შეფასება მიღებულია ცენტრალური პროგნოზისა და გასული წლების კვარტალური ეკონომიკური ზრდებიდან ±0.5 სტანდარტული გადახრის ჯამით.


1. საბიუჯეტო ოფისის შეფასებით, საქართველოს სტატისტიკის ეროვნული სამსახურის მიერ თებერვლის თვეში მთლიანი შიდა პროდუქტის და ეროვნული ანგარიშების მაჩვენებლების დინამიკური მწკრივის გადაანგარიშების შედეგად, 2023 წლის მეოთხე კვარტალის ეკონომიკურმა ზრდამ 7.0% შეადგინა.

2. www.pbo.parliament.ge




- 2023 წლის მეოთხე კვარტალში მცირედით შემცირებული საქონლით ვაჭრობის მაჩვენებლების მიუხედავად, საბიუჯეტო ოფისის შეფასებით, 2024 წლის პირველ კვარტალში უმნიშვნელოდ გაიზრდება საქონლის ექსპორტი, ხოლო შედარებით მაღალი ზრდაა მოსალოდნელი მომსახურების ექსპორტში.
- მოსალოდნელია, რომ გაიზრდება იმპორტის მაჩვენებლებიც, მათ შორის, როგორც საქონლის, ასევე მომსახურების იმპორტი.
- გაზრდილი მოხმარების ფონზე, ჯამური იმპორტის მოცულობა გადააჭარბებს ექსპორტის მოცულობას და სავაჭრო ბალანსი მცირედით გაუარესდება.

აღნიშნული დაშვებების რაოდენობრივი შეფასების შედეგად მოსალოდნელია, რომ 2024 წლის პირველ კვარტალში იმპორტის მოცულობა უფრო მეტად გაიზრდება, ვიდრე ექსპორტი და წმინდა ექსპორტის კომპონენტი 0.5%-ული პუნქტით განსაზღვრავს ეკონომიკური აქტივობის ცვლილებას, ხოლო აბსორბციის (მოხმარების და ინვესტიციების ჯამი) კომპონენტი მნიშვნელოვნად გაიზრდება და მშპ-ის ცვლილებას 6.7%-ული პუნქტით განაპირობებს*. საბიუჯეტო ოფისის შეფასებით, 2023 წლის მეოთხე კვარტლის ეკონომიკური ზრდის შეფასებაში წმინდა ექსპორტი 2.8%-ული პუნქტით, ხოლო აბსორბციის კომპონენტი 4.1%-ული პუნქტით განისაზღვრა.




*2024 წლის I კვარტლის მშპ-ის ზრდის დეკომპოზიცია. საბიუჯეტო ოფისის შეფასება.



აღსანიშნავია, რომ 2020 წელს დაფიქსირებული მკვეთრი ეკონომიკური კლების შესაბამისად ქვეყნის ეკონომიკა პოტენციურ დონეს ჩამორჩებოდა და შესაბამისად რეალური მთლიანი შიდა პროდუქტის უარყოფი გაბი ფიქსირდებოდა. აღსანიშნავია, რომ 2021 წლის მეორე კვარტალში დაფიქსირებულმა მაღალმა ეკონომიკურმა აქტივობამ ეკონომიკური ზრდის პოტენციურ დონეს გადააჭარბა და შესაბამისად, მშპ-ს დადებითი გაბი დაფიქსირდა. აღნიშნული ტრენდი შენარჩუნებულ იქნა 2022 და 2023 წლებშიც. საბიუჯეტო ოფისის პროგნოზით, ეკონომიკური ზრდის მაღალი ტემპი შენარჩუნდება 2024 წლის I კვარტალში და შესაბამისად, ეკონომიკური ზრდა მის პოტენციურ დონეს გადააჭარბებს, ანუ მშპ-ს გაბი დადებითი იქნება.

2023 წლის IV კვარტალში წლიური ინფლაციის საშუალო მაჩვენებელმა 0.4% შეადგინა, ანუ მიზნობრივი ინფლაციის 3.0%-იან მაჩვენებელზე ნაკლები.

აღსანიშნავია, რომ 2022 წელს დაფიქსირებული საშუალო წლიური ინფლაციის მკვეთრი ზრდის (11.9%) შემდეგ, 2023 წლიდან აღნიშნული მაჩვენებლის კლება ფიქსირდება. სამომხმარებლო ფასების ინფლაცია მნიშვნელოვნად შემცირდა 2023 წლის მეორე კვარტლიდან (1.6%), რაც ძირითადად მსოფლიო ბაზარზე ნავთობსა და სურსათზე ფასების კლებით იქნა გამოწვეული. აღნიშნული შემცირების ტენდენცია გრძელდება, რის საპასუხოდაც საქართველოს ეროვნული ბანკი ეტაპობრივად ახდენს მონეტარული პოლიტიკის განაკვეთის შემცირებას. 2024 წლის 31 იანვრის გადანყვეტილებით მონეტარული პოლიტიკის განაკვეთი 0.5 პპ-ით შემცირდა და 9.0% შეადგინა, რამაც საბიუჯეტო ოფისის შეფასებით, ხელი უნდა შეუწყოს ეკონომიკური აქტივობის ზრდას. აღნიშნული ფაქტორი გავლენას იქონიებს ინფლაციის მაჩვენებელზე, კერძოდ ზრდის მიმართულებით.



დამატებითი ინფორმაცია:

[წლიური მაკროეკონომიკური პროგნოზები](#)
[განმარტება მაკროეკონომიკური პროგნოზების მოდელის შესახებ](#)



2024

თებერვალი